



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH», broj: 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH», broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU BOSS-BOSANSKE STRANKE-MIRNES AJANOVIĆ

Broj: 03-07-6-221/20
Sarajevo, 24.08.2021. godine

S A D R Ź A J

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1.NALAZI.....	5
5.2. PREPORUKE	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja BOSS-Bosanske stranke-Mirnes Ajanović za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2019. godinu, utvrđeno je da je BOSS-Bosanska stranka-Mirnes Ajanović prekršila odredbe člana 4. stav (1), člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka izvršila je pregled godišnjeg finansijskih izvještaja BOSS-Bosanske stranke-Mirnes Ajanović za 2019. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, BOSS-Bosanska stranka-Mirnes Ajanović se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	145.550,43	98,63
8.	Prihodi od propagande (3-g)	0,00	0,00
I	Ukupni prihodi (1-8)	145.550,43	98,63
II	Ostali prihodi i drugo	2.027,36	1,37
	Izvori finansiranja (I+II)	147.577,79	100,00

U godišnjem finansijskom izvještaju za 2019. godinu BOSS-Bosanska stranka-Mirnes Ajanović iskazala je rashode u iznosu od 156.147,70 KM.

2. PREDSTAVLJANJE POLITIČKE STRANKE

Naziv političke stranke je BOSS-Bosanska stranka-Mirnes Ajanović. Skraćeni naziv je BOSS.

Politička stranka je registrovana kod Višeg suda u Tuzli, rješenjem broj: R-I-18/94 od 09.05.1994. godine, pod nazivom: Bosanski omladinski savez „BOSS“ Tuzla. Rješenjem Kantonalnog suda u Tuzli od 24.05.2002. godine i rješenjem Općinskog suda u Tuzli, broj: 032-O-Reg-06-000792 od 08.05.2006. godine, upisana je promjena naziva stranke, tako da novi naziv glasi: BOSS-Bosanska stranka-Mirnes Ajanović.

Sjedište političke stranke je u Tuzli, Kojšino 7.

Lice ovlašteno za zastupanje stranke je Mirnes Ajanović, predsjednik.

Lice ovlašteno za podnošenje finansijskih izvještaja za 2019. godinu je Nedžad Zonić.

Prema podacima iz godišnjeg finansijskog izvještaja za 2019. godinu, BOSS-Bosanska stranka-Mirnes Ajanović ima sljedeću organizacionu strukturu:

- Glavni odbor i
- Regionalni odbor u Sarajevu.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj BOSS-Bosanske stranke-Mirnes Ajanović za 2019. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskog izvještaja BOSS-Bosanske stranke-Mirnes Ajanović obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled, kontrolu i reviziju finansijskih izvještaja BOSS-Bosanske stranke-Mirnes Ajanović u periodu od 2004. do 2018. godine, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2018. godinu, izdat je izvještaj o pregledu sa mišljenjem revizora, nalazima i preporukama stranci da finansijska sredstva koristi isključivo za ostvarivanje ciljeva utvrđenih svojim programom i statutom, da poslovne knjige vodi u skladu sa računovodstvenim propisima, odnosno da vodi pravilne evidencije o rashodima, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da racionalno troši finansijska sredstva koja obezbjeđuje iz budžeta.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da stranka nije ispoštovala preporuke revizije.

5. NALAZI I PREPORUKE

5.1. NALAZI

a) BOSS-Bosanska stranka-Mirnes Ajanović prekršila je odredbe člana 4. stav (1) Zakona o finansiranju političkih stranaka¹.

Uvidom u Program utroška sredstava za 2019. godinu koji je dostavila stranka, utvrđeno je da je stranka planirala rashode u ukupnom iznosu od 141.980,00 KM i sredstva za nabavku osnovnih sredstava u iznosu od 5.000,00 KM.

BOSS-Bosanska stranka-Mirnes Ajanović je u godišnjem finansijskom izvještaju za 2019. godinu iskazala ukupne rashode u iznosu od 156.147,70 KM.

Pregledom finansijskog izvještaja i finansijske dokumentacije, utvrđeno je da je politička stranka sredstva u iznosu od 23.745,67 KM utrošila mimo svog programa utroška sredstava za 2019. godinu, kako slijedi:

- stranka nije u Programu utroška sredstava za 2019. godinu planirala troškove reklame i propagande. Prema podacima iz finansijskog izvještaja, stranka je u toku godine ostvarila troškove reklame i propagande u iznosu od 11.987,90 KM.;

¹ U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

- u godišnjem finansijskom izvještaju stranka je iskazala troškove ostalih zakupnina u iznosu od 57.224,00 KM, što je za 11.224,00 KM više u odnosu na planirana sredstva.

U Programu utroška sredstava za 2019. godinu stranka je troškove zakupa vozila i opravke planirala u iznosu od 46.000,00 KM.; i

- stranka je planirane troškove električne energije prekoračila za 180,63 KM, troškove ostalog materijala za 219,41 KM, a ostale rashode za 133,73 KM.

Stranka je u Programu utroška sredstava za 2019. godinu troškove električne energije planirala u iznosu od 600,00 KM, dok je iste ostvarila u iznosu od 780,63 KM. Troškove ostalog materijala stranka je planirala u iznosu od 500,00 KM, a iste je ostvarila u iznosu od 719,41 KM. U godišnjem finansijskom izvještaju stranka je iskazala ostale rashode u iznosu od 2.133,73 KM, dok su u Programu utroška sredstava ostali rashodi planirani u iznosu od 2.000,00 KM.

S obzirom da je stranka finansijska sredstva utrošila mimo utvrđenog Programa utroška finansijskih sredstava za 2019. godinu, prekršene su odredbe člana 4. stav (1) Zakona o finansiranju političkih stranaka.

b) BOSS-Bosanska stranka-Mirnes Ajanović prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu pregleda godišnjeg finansijskog izvještaja i druge finansijske dokumentacije, utvrđeno je da BOSS-Bosanska stranka-Mirnes Ajanović nije uspostavila pravilne evidencije o svojim rashodima, čime je prekršila računovodstvene propise i odredbe člana 11. stav (1) i člana 12. stav (1) Zakona o finansiranju političkih stranaka. Stranka nije obrasce godišnjeg finansijskog izvještaja za 2019. godinu popunila u skladu sa Pravilnikom o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 12. stav (4) Zakona o finansiranju političkih stranaka.

(1) BOSS-Bosanska stranka-Mirnes Ajanović je u obrascu 1-1 (teritorijalna organizacija političke stranke) prijavila sljedeću organizacionu strukturu: Glavni odbor i Regionalni odbor u Sarajevu.

Kontrolom izvoda sa transakcijskih računa i uvidom u obrazac 3-f (prihodi iz budžeta) godišnjeg finansijskog izvještaja, utvrđeno je da se tokom 2019. godine pored sredstava iz budžeta Kantona Sarajevo i Grada Tuzla, stranka finansirala i sredstvima iz budžeta gradova i općina Sarajevo, Živinice, Gračanica, Travnik i Novi Grad Sarajevo.

Sve navedno, kao i sklapanje ugovora o djelu sa fizičkim licima za obavljanje administrativno-tehničkih poslova i rada ne terenu sa članovima stranke, ukazuje da stranka u godišnjem finansijskom izvještaju nije prijavila sve organizacione odbore stranke, čime je prekršila odredbe člana 10. Pravilnika.

(2) Stranka nije uspostavila evidencije o rashodima u skladu računovodstvenim propisima i kontnim planom, troškove nije evidentirala za svaki organizacioni dio pojedinačno, te je sve troškove iskazala na obrascima 4.1 (režijsko-administrativni i ostali troškovi) Glavnog odbora i Regionalnog odbora, čime je prekršila odredbe člana 7. stav (2) i člana 22. Pravilnika.

- Stranka je troškove zakupa poslovnog prostora koji je koristila u Gračanici u godišnjem finansijskom izvještaju iskazala kao troškove zakupa poslovnog prostora Glavnog odbora.

Stranka je u obrascu 4.1 Glavnog odbora iskazala troškove zakupa poslovnog prostora u iznosu od 3.074,32 KM. Uvidom u ugovore o zakupu, utvrđeno je da su troškovi zakupa poslovnog prostora koji je koristila Centrala stranke u Tuzli iznosili 2.074,32 KM, dok su troškovi zakupa poslovnog prostora koji je stranka koristila u Gračanici iznosili 1.000,00 KM.

- Stranka je u poslovnim knjigama troškove ugovora o djelu u ukupnom iznosu od 44.883,35 KM iskazala na kontu 401300-troškovi vođenja administrativno-tehničkih poslova.

Iako je sklopila ugovore o djelu sa fizičkim licima za obavljanje administrativno-tehničkih poslova i rada na terenu sa članovima stranke opštinskih odbora BOSS Novi grad Sarajevo, Centar Sarajevo, Vogošća i Ilijaš, te odbora u Travniku, stranka je troškove ugovora o djelu evidentirala na analitičkoj kartici konta 401300-*troškovi vođenja administrativno-tehničkih poslova* na nivou političke stranke, te je iste iskazala u obrascima 4.1 Glavnog odbora i Regionalnog odbora u Sarajevu.

Stranka je u poslovnim knjigama troškove ugovora o djelu trebala evidentirati u skladu sa kontnim planom² i uspostaviti evidencije troškova po organizacionim dijelovima stranke.

c) Bez kvalifikovanja revizijskog mišljenja, skrećemo pažnju na visinu troškova zakupa motornih vozila.

Uvidom u poslovne knjige i dokumentaciju utvrđeno je da je BOSS-Bosanska stranka-Mirnes Ajanović uzela pod zakup putnička motorna vozila, te je po osnovu korištenja vozila evidentirala troškove u ukupnom iznosu od 57.224,00 KM, što čini 36 % od ukupnih rashoda stranke.

-Na osnovu Ugovora o zakupu putničkog motornog vozila stranka je iznajmila putničko motorno vozilo od Smajić Rasima na period od 01.01.-31.12.2019, godine, uz mjesečnu zakupninu od 1.700,00 KM, te mu je u 2019. godini isplatila ukupno 20.400,00 KM.

-Stranka je sa Pleho Harisom zaključila Ugovor o zakupu putničkog motornog vozila na period od 01.06.-31.12.2019, godine i uz mjesečnu zakupninu od 1.700,00 KM, te je ovom fizičkom licu isplatila sredstva u iznosu od 11.900,00 KM.

-Uvidom u Ugovor o zakupu putničkog motornog vozila koji je stranka zaključila sa Zonić Nedžadom utvrđeno je da je mjesečna zakupnina iznosila 1.000,00 KM. Stranka je ovom fizičkom licu po osnovu zakupa putničkog motornog vozila isplatila ukupno 12.000,00 KM.

-Stranka je sa Dedić Muamerom zaključila Ugovor o zakupu putničkog motornog vozila na period od dvanaest mjeseci uz mjesečnu zakupninu od 1.000,00 KM, te je ovom fizičkom licu isplatila sredstva u iznosu od 12.000,00 KM.

5.2. PREPORUKE

Preporučuje se BOSS-Bosanskoj stranci-Mirnes Ajanović da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da finansijska sredstva koristi isključivo za ostvarivanje ciljeva utvrđenih svojim programom i statutom,***
- ***da poslovne knjige vodi u skladu sa računovodstvenim propisima, odnosno da vodi pravilne evidencije o rashodima,***
- ***da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i***
- ***da racionalnije troši finansijska sredstva koja obezbjeđuje iz budžeta.***

KOMENTAR:

U ostavljenom roku, BOSS-Bosanska stranka-Mirnes Ajanović nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2019. godinu.

Šef odsjeka za revizijske poslove, revizor

Sanja Tošović

Šef Službe za reviziju

Mr.sc. Hasida Gušić

² Troškovi ugovora o djelu se uobičajeno evidentiraju na kontu 408.